

四庫全書

集部

欽定四庫全書

集部

元詩體要卷八

詳校官中書臣瞿照

助教臣常循覆勘

總校官庶吉士臣何思鈞

校對官學正臣常循

謄錄監生臣李翹鳳

欽定四庫全書

元詩體要卷七

明 宋公傳 編

引體

序先後載始末謂之引樂府集有宮商角徵羽五引
又若瑩篴霹靂思歸等引是也今取其合格而有興
比感慨而有諷寄者載之

玉環引送伯庸北上

王士熙

崑山有美璞昆吾有寶刀推雪漉寒冰凝此英瓊瑤團

團月長滿晶晶白雲淺似環環無窮寥寥人意遠有美
天山人皎潔同精神禁垣青春多大珮垂朝紳腰無大
羽箭肘有如斗印結束上京行騶駒驟長鞭不採珊瑚
鈎海深安可求不執水蒼璧漢庭羅公侯愛此玲瓏質
題詩贈與客百金一朝傾三年不可得不得只空行山
前琴峽鳴摩挲龍門石憶憶應留情天門北極高歸途
踏霜草不惜玉環分只願君還早

天門引 元好問

秦皇深居不得近從破衡成欲誰信白頭遊客困咸陽
憔悴黃金百斤盡海中仙人黃鵠舉大笑人間爭腐鼠
丈人何意作蘇秦六印纔堪警兒女古來多為虛名老
不見阿房淨如掃千年虎豹守天門一日牛羊卧秋草

蛟龍引鮮于樞

古劍咸陽墓中得抉開青天見白日蛟龍地底氣如虹
土花千年不敢食洪爐烈焰初騰精橫海已覺無長鯨
世上元無倚天手匣中誰解不平鳴割城恨不逢相如

佐酒恨不逢朱虛尚方未入朱雲請盟槃合與毛生俱
誰念田文座中客只將彈鋏嘆無魚

感古引 于介翁

孔明梁父吟深不滿於齊相烏乎天若祚漢孔
明不死天下事未可知吾於此重不滿焉

建安天下如潰瓜一榻之外非吾家黃屋飄飄定何許
龍為魚兮虎為鼠老瞞詐力敢欺天朶頤羊鼎方垂涎
紫髯將軍一攘臂控荆引越三千里慷慨山東大耳兒

南飛烏鵲栖無枝草廬一語君臣契目中久矣無吳魏
堂堂大義凜不磨靈關斂閣爭嵯峨昨夜西南一星落
六尺之孤竟誰託渭水旌旗歸故都江上空存八陣圖
抱膝長歌出師表古栢蒼蒼為誰老

華鯨引鮮于樞

石上桐孫美如玉化作長鯨喚僧粥香巖一擊六根開
剝落皮毛換凡骨中郎却顧中散驚初非黷下鳴不平
批鱗拔角就繩墨龍門綠綺瘖無聲昔聞北溟魚化作

天池鵬今見橫海姿解作威鳳鳴蕭然敗棺材蠢爾
缺
闌撐龍騰虎變固有待不遇賞音徒爾靈君不見飯牛
自賣亦何者逢時自致千秋名

清溪引贈合肥丘太醫

戴

原闕

欽定四庫全書



元詩體要

[illegible]

晉仙人初教成月下吹參差羣雛亦和鳴
緱氏山頭白雲起七月七日來相迎
長謝時人一揮手飄下滿空鸞鶴聲

闕
謠薩都拉

寒梅零落春雪洒蕭娘腰瘦無一把
淡黃楊柳未成陰何人已繫青驄馬
盡樓深處迎春歸秋千影裏紅杏肥

濛濛花氣濕人面東風吹冷輕羅衣衣上粉珠流不歇
暗解翠裙花下疊殷勤莫遣燕子知會向人間報風月

直沽謠臧魯山

雜還東入海歸來幾人在紛紛道路覓亨衢笑我蓬門
絕冠蓋虎不食堂上肉狼不驚里中婦風塵出門即險
阻何況茫茫海如許去年吳人赴燕薊南風吹人浪如
砥一時輸粟得官歸殺馬椎牛宴閭里今年吳兒求高
遷復禱天妃上海船北風吹魂墮黑水始知溟渤皆墓

田勸君陸行莫忘萊州道水行莫忘沙門島豺狼當路
蛟龍爭寧論它人致身早君不見賈胡剖腹藏明珠後
來無人鑒覆車明年五月南風起猶有行人問直沽

鬻孫謠 李兩山

白頭老翁髮垂領牽孫與客摩孫頂翁年八十死無恤
憐汝孩童困飢饉去年雖旱猶禾熟今年飛霜先殺菽
去年飢饉猶一粥今年飢饉無餘粟客謝老翁將孫去
淚下如絲不能語零丁老病惟一身獨卧茅簷夜深雨

夢回猶自誤呼孫縣吏催租正打門

淘金戶 蔡明

淘金戶淘金大江側水深沙淺淘不得夜聞叫呼來打
門官司追課如追魂呼童挑燈取金看囊中所積能幾
分課多金少輸不及里胥怒嗔徐見繫賣金買寬限金
盡限轉急歸來坐窓下妻子相對泣泣亦徒爾為輸官
不在遲南莊有田仍可賣莫遣過限遭鞭笞獨不見西
家賣田仍賣屋戶戶逋金猶不足

越城謠

程邦民

越州城城何高四十五里之周遭窪地填為基坡陀鑿
成壕白晝鞭笞夜擊橐石民之骨灰民膏越城雖高越
民勞越民勞勞未已我田不畊又科米忙忙築城歸種
禾又恐無米供官科禾苗未青得新雨城吏打門夜如
虎為言雨後新城推要我荷鋤城上來城泥不乾不敢
回又恐夜半聞春雷城頭一雨城一動越民登城向天
慟民心似與雨有仇天意實謂城無用當年

缺

天下

平天下無賊越無城乃知在德不在兵願無修城願修德使民復覩無城日

信州糧謠

信州糧糧何艱十鍾一石萬里間朝發錢王隄暮過嚴子灘拖尾白浪如銀山朝渡蘭溪州莫泊龍丘灣峻如牽車上鬼關督吏持檄夜如箭布帆無風河水乾去年糧船未及岸今年又運八百萬只知彼地荒不知浙東天亦旱只知彼民饑不知役戶家無飯家無飯儂莫愁

願化鐵騎為耕牛願銷鋒鏑為鋤耰戰場闢作畝與溝
壯士負戈荷甲歸西疇風雨時調禾黍秋禾黍不秋飯
不足浙東又移何郡粟

黃鵠謠題余節婦詩卷李孝光

黃鵠黃鵠牝牡相隨遊于四海不識別離始妾結髮時
與君年相齊一朝納伉儷百歲以為期奈何乎中路而
捐子與妻且君之祖妾逢百罹父母將我去親戚奪我
志言云為我志言云為我計長久祇令增傷悲憶君垂



詠託我孤兒我嗔君言奈何見疑晨起作羹與麋欲持
飴阿誰嗟我不如黃鵠將子與婦至死相隨飛我寧用
生為我寧用生為衆人何知惟餘天知

茅山謠

道人兩鬢青如蓮大醉上山排青天青天蕩蕩玉盤出
引手舉盤天上懸銀河倒掛桂樹影長風吹香落丹井
地上小兒霑玉馥白兔急擣玄霜熟惜惜仙家十二樓
夜半起拂跋烏浴手招茅君叫列仙帶劍上立紅雲前

茅君騎虎上天去道士乞我明霞篇

小姑山謠歐陽應丙

小姑近在水中央薜荔為衣蘭佩香翡翠奮翼青霞光
宛其螭首蛾眉長紫金芙蓉出綠波白玉臺鏡開青螺
涉江浩蕩興無極臨風窈窕揚清歌大姑阿姨寄傳語
相望烟波柰何許日暖江南滿白蘋金釵落地湍風起

廬山瀑布謠楊維禎

甲辰秋八月十六夜予夢與酸齋仙客遊廬山

各賦詩酸齋彭郎詞予賦瀑布謠

銀河忽如瓠子決
瀉諸五老三峯前
我疑天孫織素練
素練脫軸垂青天
便欲手借并州剪
剪取一幅玻璃烟
相逢雲石子有似
捉月仙酒喉無耐
夜渴甚騎鯨吸海
枯桑田居然化作
十萬丈玉虹倒掛
清冷洲

走狗謠

走狗匍匐走狗匍匐
帝騎赤龍呼狗逐
鹿兔既死騅亦
追鹿馳鹿走軹道
窮無歸赤龍赤龍
上天飛歸來雌雉

作雄吼長樂宮中烹走狗嗚呼兔死狗烹狗及豨如何
不存走狗制雉雞反殺走狗聽雞啼

舶上謠送伯庸以番貨事奉使閩浙

宋本

江華江月要才情多病堪憐馬長卿莫向都門折楊柳
帝鄉春色不南行

又

流球真螭接閭婆日本辰韓歲貊倭番江去時遺矸石
年年到處海無波

又

朱張死去十年過海寇凋零海賈多南風六月到岷酒
花股篙丁奈樂何

又

湧金門外是西湖堤上垂楊盡姓蘇作得吳趨阿誰唱
小卿墳上露蘭枯

又

舊時家近黑橋街三十餘年不往來憑仗使君一問訊

楊梅銀杏幾迴開

又

閨中父老白髭鬚老子風流記得無
昔日郎君騎竹馬如今使者駕輶車

又

素馨花畔十八娘炎雲瑞露酌天漿
一日供厨三百顆使君館券莫支羊

又

薰陸胡椒膈朮臍明珠象齒駭難犀
世間莫作珍奇看
鮮使英雄價盡低

又

東海澄清南海涼
公厨海錯照壺觴
郎君養好江珧脆
水母線明烏賊香

又

明年歸路蹋陽和
缺胯輕衫剪越羅
春風通惠河頭路
還與官家得寶歌

詠體

詠之言永也嗟嘆之不足故永歌之如曹子建三良
詩陶淵明之詠荊軻詠貧士顏延年五君詠是也今
劉靜修詠史含諷意趙松雪逸民懷隱情元遺山湘
夫人得錦囊句此皆詩法之妙不可無也

四皓詠

劉因

留侯在漢廷四老在南山不知高祖意但欲太子安一
讀鴻鵠歌令人心膽寒高飛橫四海叱雞生羽翰孺子

試可教從容濟時艱平生無遺策此舉良可嘆出處今
誤我惜哉不早還何必赤松子商洛非人間

逸民詠 趙孟頫

驅車秣駕馬吾將適齊國聞有魯連子個儻好奇畫一
談秦師走再說聊城拔功成不受賞高舉振六翮布衣
終其身豈復為世役茫茫千載遠安往訪遺跡躊躇東
海上向風長太息

又

四時相代謝榮耀安足恃
瓜田引新蔓不見桃與李
知士解其會遇坎當復止
邵生故秦吏乃亦睹茲理
賢哉感我懷三歎不能已

又

子真初亦仕歲晚乃逃之
區區南昌尉上疏忘其卑
忠信不見用耿耿當告誰
飄然棄妻子終身與世辭
抱關甘貧賤所貴莫我知
至今九江濱清風激羣黎
神仙信茫昧此士獨不疑
孤雲無定在逝水何時歸
遐思一矯

首悵望無由期

又

悠悠空山雲泱泱長江流廊廟意不屑山澤聊淹留故
人在天位高步追巢由豈曰子無衣辛苦被羊裘東京
多節義之子乃其尤窮居雖獨善輔世豈不優

又

汪汪千頃陂不為人濁清道周言行表蕩然無得名誰
言牛鑿兒乃是人中英當時無間言後世流德聲思之

不可見使我鄙吝萌淳風久已漓此意豈復存時無君子者雖賢寧見稱

又

南州有高士食力事耕稼優游聊卒歲不矯亦不隘大木行欲顛紆纚豈足賴何為諸老翁栖栖不遑舍斯言非無見明哲自高邁誰能懸一榻待子來稅駕

又

鹿門何亭亭下有避世賢鳳雛隱林中卧龍蟠其淵一

朝起高翔斯人獨深潛功名不可為我志久已安一聞
者舊傳使我心悠然

又

黃鵠羽翼長一舉思千里幻安本中原乘槎走東海舉
世方尚同遠引存吾志流風漸異俗敦禮化鄙鄙子魚
平生友胡乃不相委

又

塵世非所便田園久相招歸來三徑中蔚蔚長蓬蒿雖

有荷鋤倦濁酒且陶陶茫茫大化中委運將焉逃唐虞
去已遠由來非一朝粲粲霜中菊采采忘其勞

湘夫人詠 元好問

木蘭芙蓉滿芳洲白雲飛來北渚遊千秋萬歲帝鄉遠
雲來雲去空悠悠秋風秋月沅江渡波上寒烟引輕素
九疑山高猿夜啼竹枝無聲墮殘露

女史詠十八首 楊維禎

李夫人

金屋君王獨有情
少翁魂魄夜張燈
可堪一死禍猶烈
身繫胡塵到李陵

鈎弋夫人

僥儀未換母儀尊
聞道君王已寡恩
太子宫中無木偶
可無鞠域到堯門

伏生女

老子當時無女雛
秦灰安得見全書
中郎有女能傳業
傳得胡笳業不如

班婕妤

長門不用買多才
紈扇炎涼善自裁
五鬼一言能寤主
秋觀愁殺望思臺

趙昭儀

通仙門裏春晝長
侍兒新擁試蘭湯
君王空散黃金餅
不見宮中赤鳳凰

王氏后

沙禁鍾靈六百年
存劉一壘忍輕捐
老天有意母天下

黃霧如何塞九天

賈南風

識暗鳴蛙苦不夫
簾箱下取洛城奴
宮中得子如銅馬
豈特琅玕犢換駒

綠珠

百斛明珠價莫加
高樓投壁壁無瑕
臨春不死燕脂井
又逐降幡上檻車

馮小憐

前山校獵御同車一笑平陽等戰蝸換得后衣纔上馬
琵琶自屬代王家

獨孤后

別宅猶容駕短轅獨孤苦以妬虧賢他時崔婦生家禍
晉邸安孃寵自專

武后

忠良斬刈若芟薶乳虎蒼鷹積滿朝可是唐臣無杜伯
危心只忌六宮猫

楊太真

萬花叢裏澤初承
紫磨金搖不自勝
義髻早知無死所
不如生不負青陵

王凝妻李氏

山店孤兒背面啼
玉腕一解軟如泥
當時義勇能相敵
木葉山中亦有妻

盼盼

冢上白楊今十年
樓頭燕子尚留連
銅臺多少丁寧恨

誰向西陵望墓田

韓蘄王夫人

巫家卜偶不為嫌
優女占夫事更堅
看取異時真畏友
九重書上議黃天

宋度宗女嬪

一曲高歌玉樹秋
小嬪端解替人愁
葉妃只解傷春泣
之死何知恤緯憂

青峰廟王氏

介馬馱馱百里程青峰後夜血書成只應劉阮桃花水
不似巴陵漢水清

女貞木楊氏

守死重關志不睽九泉不負陸郎妻至今墳上女貞木
不受商陵怨鳥栖

吳詠十章

館娃宮裏落花多春色撩人可奈何南省風流文架閣
宮才解賦館娃歌

又

曾侍虛皇第二筵
鐵仙輕脫故依然
江州坐上初相見
還識人中孟萬年

又

杜牧尋春苦未遲
水晶宮裏舊題詩
小鬟莫訝腰如束
善唱白家楊柳枝

又

馬上郎君出帝城
瓊林宴裏記相迎
吳山吳水新迎送

學唱陽關第四聲

又

淮南八月鴈初過奉使楂迴烏鵲河十里揚州花底散
五陵年少已無多

又

夏駕湖頭朱雀舟湖光山色不勝秋丘中不見金銀氣
臺上閒看麋鹿遊

又

江上梅花鐵石心江南腸斷越人吟
南垣閣老多情甚才見梅花便抱琴

又

鴟夷仙去五湖船故國何人憶計然
昨夜洞庭秋水長夢聞廣樂下鈞天

又

黃菊初華客未歸登高自試苧羅衣
眞娘墓下好紅葉伍相祠前多翠微

又

地行仙子羊權家曾降山中萼綠華三十六橋明月夜
蘇州城裏有瑤花

客樓小詠

樓下飛塵障日紅樓頭百尺有元龍五更酒醒風雨作
卧聽行人踏曉鍾

又

雨餘樓閣長如畫雲外笙歌不識愁借問主人新句好

灞橋只在朱橋頭

龍虎山四詠 貢師泰

金雞山

巨靈劈山石飛出黃金雞至今山下人猶聽雲中啼

象山

載寶出西域獻琛自南溟仙人一叱之化作青峻嶒

龍井

寶劍落深潭時時見光怪鱗甲飛上天白晝風雨快

雲臺山

天星二十八下作漢廷將功成歸帝傍精彩射石上

篇體

篇徧也寫情鋪事明而徧也觀曹子建之名都美女
白馬諸篇可見今所取者如寶釵之誓雪國耻節婦
之足厚風教凌雲之脫屣聲利上陵者冬青塚之寓
諷感意真明而且徧者也

寶釵篇曾敷言

千金買寶劍氣燄凌清秋指天星斗動刺水蛟鱣愁坐
起常佩之誓與報國仇北斬單于首西斷莎車頭還報
漢天子掛劔崑崙丘

翟節婦篇

劉因

易之西山乃有婦人曰翟氏年二十餘其夫從
軍死於所事出入兵刃往復數百里晝伏夜行
以其屍歸負土而葬之既葬自以早寡無子遭
時如此思以義自完乃自決於墓側鄰里救而

復蘇終始一節今八十餘年矣

兵塵浩無際烈士難自全婦人無九首志欲不二天燕
山翟氏女既嫁夫防邊一朝聞死事健婦增慨然生有
如此夫早寡非所憐求尸白刃中負土家山前事去哀
益深義重身可捐無兒欲何為所依惟黃泉鄉鄰救引
決烈日丹衷懸誰辨節孝翁重賦睢陽賢我昨過其鄉
山水猶清妍聞風髮如竹飄蕭動疎煙千年吟詩臺我
我大寧巔為招馮太師和我節婦篇

凌雲篇

范梈

往與凌雲山人披虎豹謁太清是時東風滿瑤京綠楊
三月聽流鶯君隨掛席湘江行予亦騎馬趨承明手把
宮袍厭縛身却憶南溟有縱鱗四年辭海嶽一舉上星
辰逢君却向凌雲下心上經綸甚瀟洒半夜清猿四合
啼長松古月照回溪桃花原上路一去意都迷我本凌
雲峰畔客何日相從卜其宅早服還丹生羽翼共脫朝
衣掛青壁

美人篇

貫雲石

仙風雕雪玲瓏溫吳姬剪月纖纖昏行雲補髻翠光滑
鳳凰叫落空山月手摘閒愁八字分春山恨重畫不伸
肌穠汗膩朱粉勻背人揮淚粧無痕霜刀自製石榴裙
閉門不識諸王孫綠烟薰煖藍田玉羅帶隨風換粧束
飛鳥銜怨過長門芳菲不忍韶華屋連環步窄玉珮響
霓裳袖闊東風長釧鬆腕瘦覺多情舉指搔天天亦癢
枕香帳冷蘭燈沉落花不入芙蓉衾三山路杳銀河深

彩鸞高訴愁人心天與美人傾國色不如更與美人節
夢裏梅花夢外身萬古千年一明月

遠遊篇

范叔中

仙人手把金芙蓉邀我上陟蓮花峰兩眼注入滄溟東
浮雲遮斷扶桑宮白日西飛恐成晚駕天五色橫長虹
鳳凰儀羽備珍彩欲集不集無橫桐冥冥杳杳脫羅網
亦有數點南飛鴻怒鯨崔巍鼓鱗鬣浪中瑣屑多沙蟲
從今喚起人中龍披虎豹謁九重舞干羽息武功泰和

世上皆春風是時勒石留鼎鐘左招黃綺右赤松長歌
歸去來山中長歌歸去來山中

送衣篇

周德可

長城萬里飛秋沙弓馬夜驚雪作花龍泉吐光射天地
是妾揜鏡夫辭家此時惜別方壯年壯年花發園中烟
征鴻無書日苦短牛女夜夜銀河邊萬瓦欲霜楓似綺
親送寒衣數千里匣鸞鶴影鳳孤飛山過望夫道湘水
湘水無情漾白波望夫山石浮青螺長途行處意慘愴

誰家嬌女終夜歌衛霍功高猶躋武善馬未歸羝羊乳
開河回首路迢迢愁雲西山水南浦夕陽孤館停征輶
一身百慮雙涕交中宵無人語聲絕風吹燭短山月高

上陵者篇

楊維禎

步出城西關松栢鬱盤盤道逢上陵者手指西陵田借
問葬者誰大將葬衣冠大將非戰死軍中達爾罕健兒
啖人鮓無骨賜桐棺

冬青塚篇

老牴夜射錢塘潮天山兩乳王氣消禿妖尚厭龍虎怪
浮圖千尺高峇堯文山老客智且勇夜舟拔山山不動
江南石馬久不嘶塚上冬青今已拱百年父老憤填胃
不知巧手奪天工冬青之木鬱葱葱六櫓更樹蒲門東

禽言體

禽言鳥語也皆因其自呼之名而名之宋梅聖俞蘇
東坡朱文公俱有詩今所得者詞麗而意婉必假喻
以達事情使人快覩而易悅似勝於前人之音格云

四禽言 梁棟

不如歸去錦官宮殿迷烟樹天津橋上一兩聲叫破中原無住處不如歸去

又

脫却布袴貧家能有幾尺布織盡寒機無得裁可人不來庶叔度脫却布袴

又

行不得也哥哥哥哥湖南湖北春水多九疑山前叫虞舜奈

此乾坤無路何行不得也哥哥

又

提葫蘆年來酒賤頻頻沽衆人皆醉我亦醉哀哉誰問
醒三閭提葫蘆

八禽言 桂瓊

姑惡姑惡姑不錯姑惡何如小姑惡小姑諧妾生間言
遂令婦姑情分薄朝嗔暮逐去不辭珍鮭誰供膾誰斫
但願小姑他日嫁兒夫還遇惡姑如小姑

又

提壺提壺復提壺
提壺沽酒何處沽
彭澤公田誰種秫
臨邛女子羞當壚
客來煮茶度寒夜
杖頭不用懸青蚨
提壺提壺勸爾即
緘口覆爾居巢碎
爾首

又

婆餅焦婆餅焦
阿婆製餅婦為燒
爐紅火烈餅成炭
婆怒逐婦歸蓬蒿
化為異物身羽毛
至今銜怨語聲高
婆餅焦婦休逐少
待來年新麥熟

又

脫布袴脫布袴人情好新皆厭故古來聞有韓昭侯此
日那逢庶叔度千需萬索杼軸空今年新衣在何處脫
布袴風雨寒脫時容易換時難

又

三箇半布積絲累寸盈尺度下機先製老姑衣忍使天
寒披故絮篋中止有半匹存征人書來索襦袴布已盡
秋又風妾身依然單過冬

又

不如歸不如歸山川良是人民非風波逢路多險巇車
摧舟覆將安之穀城黃石待已久上蔡蒼鷹悔却遲不
如歸歸及早白雲滿地無人掃

又

泥滑滑泥滑滑莫雨潇潇暝雲結苦竹岡頭虎跡新黃
蒿城外人蹤絕僕夫股栗步莫前瘦馬凌兢愁仆顛泥
滑滑何時乾出門咫尺行路難

又

行不得也哥哥千呼萬喚奈爾何黃陵花落暗春雨湘
江水深生素波奮衣出門天地窄仗劍欲往旌旗多行
不得早歸來只今誰掃黃金臺

元詩體要卷七

欽定四庫全書

元詩體要卷八

明 宋公傳 編

香奩體

唐人用此體言閨閣之情乃艷詞也與玉臺體相似
今人倣之者雖多要之發乎情止乎禮義者則少故
取而列於左云

香奩四首 黃伯暘

與君生別離
朱簾長不開
春風故相撩
燕子雙歸來

又

雙雙相思鳥飛上相思樹相思雖不同同是相思苦

又

昨夜海棠花睡足西窗雨春夢苦無憑知在阿誰處

又

下階拜新月空庭夜如水相思隔千里未有團圓意

香奩八詠

翠袖啼痕

石竹繡羅雙袂單綺窓日暮籠輕寒秋波滉漾落鉛水
相思幾點春斑缺脂濃粉膩半塵土玉臂嬌柔嬾輕舉
東風十日吹不乾六曲闌邊海棠雨

黛眉顰色

落花雨歇春日西楊柳鎖烟鶯亂啼玉人絨恨不能語
兩蛾對蹙春山低離愁一味如膏膽額上蘭煤香半減
風流京兆知不知它日歸來看濃淡

月奩勻面

揚州青銅出深井粉綿拂拭冰光冷粧樓笋指揉紅玉
素蛾飛出嬌相並櫻脣斂氣不敢呵脂濃粉淡勞揩磨
雙鸞掩罷出門去一陣落花紅雨過

冰盆沐髮

井花滿注玻璃綠一片春澌瑩如玉晴窓解下十八鬟
三尺青絲漾寒渌蘭膏洗盡香膩消滿手綠苔新帶潮
露蟬翅濕飛不起花霧曉妝紅日高

繡床凝思

碧紗如霧針如芒
茜紅絨索三尺長
越羅幅寬金縷細
綠波飛起雙鴛鴦
匿蘭含蕙春無語
一寸柔腸千萬緒
青鸞錦字期不來
恨滿城南杏花雨

金錢卜歡

寶猊焚香蟠紫烟
玉葱拈出雙團圓
春心一點怕人識
舉頭暗語蒼蒼天
欲擲未擲還再祝
聲動瓠犀三十六
小桃開後是歸期
分付陰陽莫翻覆

香塵春迹

七寶方床冰樣潔軟粉半鋪紫檀屑凌波小鞵曉痕輕
一鈎淺印纖纖月金蓮襯步身欲浮鴈沙踏破春應羞
羸得纖腰柳枝瘦珍珠百斛知誰收

霜杵秋聲

青娥篩空冰粉乾石光如鏡敲清寒更長月白響

缺

碧梧驚起雙棲鸞堂上阿姑身未暖千音萬韻勞玉腕
要使離人枕上聽憑仗西風莫吹斷

又八詠 錢樞

金盆沐髮

一片香雲濕不飛
翠光浮動影娥池
盈盈蟬翅含風冷
剪剪雅翎帶雨垂
泉沫亂跳珠錯落
指尖微露玉參差
粧成倦把闌干倚
滑墮金釵不自知

月奩勻面

春盡花枝瘦幾分
曉粧不覺暗消魂
羞蛾謾自橫眉黛
薄粉何由掩淚痕
青歲難留人易老
翠鸞飛去影空存
愁來拍塞成長嘆
噓得清光慘欲昏

玉頰啼痕

愁思無心整玉容
幾番花下立東風
漬殘嬌靨娟娟翠
界破蜂黃縷縷紅
羅袂揜時香欲溢
春纖抹處暈微融
小環欲解人憔悴
咲指梨花暮雨中

黛眉顰翠

悶拽羅裙下玉除
小桃花下立踟躕
幾分春色傷心處
一點梅酸濺齒初
山麝空青渾欲暝
柳絨寒綠未全舒
龍沙北睇三千里
倚遍闌干思有餘

芳塵春迹

按舞霓裳點拍頻紫鸞簫底步香塵故將羅襪雙鈎玉
踏破紅雲一片春殘月淡籠烟漠漠並鴛交卧水粼粼
莫教燕子嘶將去留向東風擬洛神

雲窻秋夢

桂花香冷夜沉沉睡熟銀屏小鳳衾杳杳不辭湘水遠
悠悠直過楚雲深紅椒樹底鴛鴦比黃葉風前蟋蟀吟
預報砧聲莫驚覺暫容攄盡別離心

繡床凝思

綠窗人靜畫厭厭拋却金針懶再拈香臉托殘紅一線
黛眉蹙損翠雙尖愁如亂絮隨風落恨似飛花帶雨粘
小玉謾將簾幙捲忍看雙燕拂雕簷

金錢卜歡

寶鴨香飄篆縷浮金錢倒擲思悠悠雲邊昨夜聞歸鴈
花外何時聽紫駟幸得如期猶慰意若為歸晚更添愁
無憑莫似簷間鵲幾度空教倚畫樓

香奩踏莎行八閨 王德璉

金盆沐髮

寶鑑凝膏溫泉流膩瓊纖一把青絲墜冰膚淺漬麝煤
春花香石髓和雲洗玉女峯前咸池月底臨風細把犀
梳理陽臺行雨乍歸來羅巾猶帶瀟湘水

月奩勻面

冰鑑懸秋璫腮凝素鉛華夜搗長生兔玉容自擬比姮
娥粧成又恐姮娥妬花影涵空蟾光籠霧芙蓉一朵薄

清露年年只在廣寒宮
今宵鸞影驚相遇

玉頰啼痕

粉凝紅冰香銷獨髓
鏡鸞影裏人憔悴
梨花帶雨不禁愁
玉纖彈盡東風淚
恨鎖春山嬌橫秋水
臉桃零落胭脂碎
故將羅帕濕薇魂
寄情欲比相思字

黛眉顰色

淡掃春痕輕籠芳靨
捧心不效吳宮怨
楚梅酸蹙翠尖纖
湘烟碧聚愁萋萋
紺羽寒凝月鈎金
灩鶯吭咽處微

偷歛新翻嫵態太嬌嬈鏡中蛾綠和香點

芳塵春迹

金谷遊情消磨不盡軟紅香裏雙鷗印蘭膏步滑翠生
痕金蓮脫落淩波影蝶徑遺蹤鴈沙凝潤為誰留下東
風恨玉兒已化夢中雲青蘋流水空仙詠

雲窻秋夢

煙冷瑤稜神遊貝闕芙蓉城裏花如雪仙郎同躡鳳凰
翎千門萬戶皆明月海碧山青天荒地老滿身風露飄

環玦高樓畫角苦無情一聲吹散雙蝴蝶

繡床凝思

翠藻文鴛交枝連理金針停處渾如醉楊花一點定春
心鶻聲啼斷人千里喚醒離魂猶疑夢裏此情恰似東
流水雲窓霧閣沒人知綃痕搵透紅鉛淚

金錢卜歡

暗擲龍文尋盟鸞鏡龜兒不似青蚨準花房羞化彩蛾
飛銀橋密遞仙娥信錦屋瑤樓薄情飄性碧雲望斷紅

輪暝珠簾立盡海棠陰待溫遙夜鴛衾冷

續幣二十首 楊維禎

學琴

阿琰胡笳不足傳離鸞別鵠意淒然請郎為洗箏琶耳
不惜為郎彈絕絃

學書

歌徹陽春酒半醺玉尖搦莞蘸香雲新詞未上鴛鴦扇
醉墨先污蛺蝶裙

演歌

鶯鶯舌巧言猶獠字字使君親口教今日金錢初受賞
倚聲同合鳳凰巢

習舞

十六天魔教已成背反蓮掌苦嫌生夜深不管排場歇
尚向燈前蹈影行

上頭

新年攏鬢及笄期雲綰盤龍一把絲掩鏡問人人盡道

南梳北裹總相宜

染甲

夜搗守宮金鳳蕊
十尖盡換紅鴉背
閑來一曲鼓瑤琴
數點桃花泛流水

照畫

畫得崔徽卷裏人
菱花秋水脫真真
只今顏色渾非舊
燒藥幪頭過一春

理繡

揀得金針出象筒
鴛鴦雙刺扇羅中
却嗔昨夜狸奴惡
抓亂金床五色絨

出浴

初訝洗花難抑按
終疑沃雪不勝任
豈知侍女簾帷外
剗取君王數餅金

甘睡

漏減良宵晝日遲
困人天氣酒中時
東家女伴太嬌劣
偷解裙腰竟不知

相見

酥凝背甲玉槎肩只訝紅綃覆白蓮底事太陰藏火性
狂夫夜夜為君然

相思

深情長是暗相隨月白風清苦苦思不是東姑痴醉酒
幙天席地了無知

的信

早時詭語難為信醉後微言却近真昨夜寄將雙豆寇

始知的的為東鄰

私會

月落花陰夜漏長
相逢疑是夢高唐
夜深偷把銀缸照
猶恐慙奴瞰隙光

成配

眉山暗淡向殘燈
一半雲鬟撒枕稜
四體着人嬌欲泣
自家揉碎研繚綾

洗兒

曾向金盆弄化生寶珠親見掌中擎從今不帶宜男草
豆寇含胎恐太缺

秋千

齊雲樓外紅絡索是誰飛下雲中仙剛風吹起望不極
一對金蓮倒挿天

蹋鞠

月牙束鞞紅幪首月門脫落葵花斗君看脚底軟金蓮
細蹴花心壽郎酒

釣魚

鼓針作釣投水隅豈圖口味膾王餘鯉魚腹裏牽芳餌
萬一行人有素書

走馬

胡佞牽來獐叱撥輕身飛上電光抹半兜玉銙裏湘裙
不許春泥汗羅襪

陰何體

梁陰鋸子堅與何遜仲言以能詩齊名其詩清深穠

麗號陰何體今得四家之作其詞致婉約音聲合比
亦彷彿二賢之體裁以句語較之終不若本體之圓
美云

王肱畫吳王納涼圖應制

虞集

雨過太湖上風生響屨廊紅綃拂几席白紵製衣裳朱
光淪厚地明月在高堂何以保玉體長年樂未央

送吳子高

懷寶獻京國悼亡還獨歸日落雲中樹風吹江上衣湘

靈瑟在席織女石支機遠道多寂寞彊飯勿相違

辛澄蓮花觀音像應制

揭傒斯

至人不可測宴坐青蓮花珠纓被玉體白豪貫彤霞從
何得此相來置玉皇家

送人歸豫章

積雨霽徂夏故人今日歸手持毛生檄身着萊公衣玉
樹掛秋月丹萸揚曉暉東湖徐孺子應怪久相違

大口迎駕和觀應奉韻

余闕

晨光開翠嶠廣路淨炎氛玉軼度流水華蓋爛垂雲既
御大宛馬還朝鯉海君都人望旌纛樂哉過采芹

大別山古柏

二儀表嘉瑞孤根託漢坻已知枝幹古誰徵疏鑿時玄
泉上靈液玉露濯華姿間厠七寶樹比擬萬年枝願奉
蒼蒼色千秋長若斯

賦得蛾眉亭送杜德常御史赴南臺

江亭望華嶸望望似脩眉掃黛偏能巧含顰知為誰娟

娟微雨裏脉脉夕陽時千里乘駟去因之傷別離

賦得春鴈送司執中江西憲幕

微風起蘋末旅鴈尚回翔乳鴨嬌同啜新蒲短可藏應
懷洞庭水非避塞垣霜客路煩懷舊題書寄帝鄉

賦得君子泉送彭公權為黃州教

君子歿已久遺井齋郎中本寓思人意無全澤物功銀
床駁故蘚玉甃落寒銅幾日趨官舍橫經誦養蒙

賦得慈恩寺塔送李惟中侍御之西臺

祇樹塔廟古締構出星辰華玉裁文陞金銅結綺輪高
標跨雙闕迴眺極三秦攬轡霜臺下題名繼昔人

賦得九里松送吳左丞之江浙

結駟向青郊松陰九里遙言從天竺寺直渡小春橋偃
蹇成芝蓋蕭瑟蔭蘭橈相送將何贈期君保後凋

有所思

春風起寒色春衣方重熏新粧卷羅幕清唱入行雲艷
色若流月芳澤訓蘭芬嬋娟信無度我思何在君

齊河節婦

河水北流急人家臨廣川桑柔初覆隴苗生復滿阡似
聞田峻遠益知寡婦賢吾徒能捫屨亦願共鄉田

飲散會盧使君

契濶思相見留連及此辰長江映酒色細雨若歌塵所
喜襟懷共由來態度真何時洗兵馬得與孟家鄰

題合魯易之山水

窓中望蒼翠春水起晨霏孤嶂纔盈尺長松未合圍蕭

蕭此僊客日日候巖扉念爾空延佇王孫且未歸

送王闕赴泗州打捕提舉

蒼茫吳楚會縱橫淮汭流春水未泮渚芳杜已生洲揚
旌朱樓前張獵青山幽獻功效大兕亦致公子裘逍遙
足為樂何嗟晚不侯

賦得琵琶峯送人降香龍虎山

瓊峯毓竒態高高出先天柄超琳闕迴盤影淥池圓別
闕標蒼樾回窻蓄紫烟淙流如度曲藤蔓似長絃肖像

生儀始希顏太古前雖無羅袖拂常暎砌花妍子有靈
侯技能彈大道篇玉香一臨眺天際意飄然

竺雲為曇上人作李孝光

雲來自西極駘蕩復委蛇影度流沙曉峯臨鷲嶺奇從
龍飄宛轉觸石起參差光擬鳳毛紫清同玉葉垂芙蓉
連華岳綺藻映天池五色生祥瑞賢人懷羽儀

玄真館飲酒分韻得銜字

良朋謝悃邑仙賞屬玄冬野淨梅將發山乾雪不封生

萸近芳節出日媚川容愁用詩湔浣寒憑酒折衝幽人
每多暇俗子自無悰聊以共娛悅詎知縻萬鍾

聽雪為趙本初作

玄冬易蕭瑟積氣但清寥夜嚴方有覺天靜不成囂深
坐愁如見微聞去已遙新暉留素魄妍密屬青腰聲故
知拂竹花重想封條高居爾最樂難拔俗人標

題李子雲白雲意

白雲如白月宛宛復離離青霓依澗出玉葉映簷垂詎

金
關飛花度還同病鶴窺紛暉舍戶牖倒影散園池近看
呼欲落佇立意俱遲坐卧常相對成峯晚更奇

送人歸吳中 揭傒斯

三月酒如澠高堂絲竹停繡筵雙鳳影珠箔亂鶯聲疊
應紅牙拍辭傳金縷名綵雲低不度芳塵暗自驚花發
長洲苑日照闔閭城且奉千金壽寧忘萬里情

吳彥高悼亡歸岳陽

都門落葉滿遊子去京畿忍聽離鷺操遙逐秋鴻飛愁

霜曉入鏡淚雨夕沾衣烟樹黃河岸風帆采石磯平沙
迴渺漫寒宇暖煮微客心閒轉切鄉書近却稀夢聞兒
女泣行將童僕依竊慕漆園放誰云潘岳非乘濤慣不
險迴江望若圍武昌未易到更向岳陽歸

聯句體

聯句者在座之人角其才力率然成句聯絡成章對
偶親切類乎誇奇鬪戲也石鼎鬪雞可見矣李夫人
何足多哉是編亦足以見其葩辭藻思之勝觀者幸

勿易之

遠遊聯句

袁袞

壬寅冬與伯長同留姑蘇時伯長將赴都

海鵬跨南雲一去挾浩蕩宛駒踏北雪絕足追罔象宵
征車載脂楠明發燈在幌行邁念悄悄離愁懷養養違

吳始接浙

袞

過越猶指掌虹網結長思羯鼓促新響觴

至不復辭楠

楠

駕逸誰能彷彿明堂企棟梁武庫須篠簜材

同瑚璉英袞

學媿蓬麻長

缺

施朱弦清小薦金莖沆雲

間鶴孤唳

楠

天外鴻橫上曉舲斫輕冰午店憇平壤追

攀瞰波濤

哀

涉歷走塵鞅清淮橋螭薄霧裊驕驕風

臺牛一鳴

楠

日觀雞三唱團桑沃如蓋宿草亂若經青

帘客沽酒

哀

素鬣漁收網心觀洙泗流眼豁恒岱爽追

程騎侵雲

楠

勸耕農植杖俗厚喜豐登氣俠存慨慷伊

河既東流

哀

維斗復北仰誰云風土殊始覺宇宙廣骨

聳終超騰神清誰懣悅鈞天夢豈真

楠

廣寒步空想銖

衣入閭闔芥粒視北垞千官紫府榮九奏彤庭暢搞文

剪金炬裒展窠簇天仗清都踰咫尺弱水謾方丈絳旗

雲霧開寶扇日月晃仁聲被八表楠德意昭羣枉泥檢

極封崇芬飭嚴肝蠻瑞氣藹重重泰階瞻兩兩馳峯出

天厨裒裏䟽錫中帑鳴珂接俊彥正笏遠偏黨德人笑

採芝逋客棄拾橡茅拔要有方楠矢來本無嚮湘纍但

環詞楠越相僅金像遭讒氣徒憤得計身何往豈如及

承平相與窮昭朗君行步飄飄我滯心悵快輕霜着裘

帽裒微雪留草莽離歌起蒹葭古製却盆盎先登匪一

獲後至激孤獎城南燈火深

梅

塞北音書駐春風漸披拂

水將淩瀆詩成愈加險酒盡未為彊雙眸秋水炯

哀

累語春

波盪經行度崎危交友希惆儻羈遊棄楚荒遠客憐齊僉光

陰赤壁重

梅

事業千金賞行還鴈塔題復覩鴻都榜時來戒

步窘事至勿技癢脂韋本凡近

哀

鐵石乃忠謹詞林納疵美

書田計荒穰列仙會儒癯羣仕趨吏駟陸生強呶嚶陶令終

骯髒清心百士避正色上帝饗徒為捧心施莫學畫眉敞功

名要無心造物端有相行行遂初志操持記疇曩

梅

同永嘉李季和望鍾山聯句 丁復

鍾山日在望，匏繫未能往。我本忘世人，光誰能久塵鞅。

窮猿尚擇木，復冥鴻不離網。叢爾升斗縻，光迺此尺尋。

枉川江互迢遞，復天地一莽寰。霸氣遂終陳，光山名猶。

姓蔣榮羸結幽躋，復拔茹傾勝賞。蹊林萬虬伏，光甍石。

羣獸仰雨晴，虹霓裂，復雲熱鶴鶴響。靈骨瘞浮屠，光癰。

踞踞方丈陟，閣鷹巢危，復闕戶蜂房啟。禪林舊稱一，光

梵刹新闡兩。苾芻化城喻，復獬豸嚴駕上。一人刺小月。

光七佛築峻壤狡狴脾玉除復蚪斗胃銀膀庸超謝羶

葦光媚禱懷肸蠻俗子空卑栖復至人廓遐想相期訪

龍蟠光何如游鴈蕩牕明誦楞嚴復林昏過魍魎終然

千仞巔光極被九州廣圓龕坐覓心復方具跪合掌攬

秀目顒顒光討幽心養養沈綿阻客遊復爽塏聆人獎

境虛雲壓闌光江遠浪浮漿揮清宜麈尾復翳靜便鶴

覽域分三國鼎光淮湊百川輞喜彈青綺冠復倦曳綠

玉杖朝情竟崎嶇光夜夢猶髴髻祝酒遣詩魔復搜句

搔技癢深推衆壑宗

光

雄據諸峯長眼碧覽益遠

復

髯

白聯苦強地籟息箕箒

光

天絲遺女紡金聲調危譯

復

石華繡卑礫騎驢約茲後

光

驚猿記疇曩賢罄怨支離

復果歸

缺

莽蒼閒休幻安席

光

敏奪雲門棒竹露曉衾

濕復松颺秋髮爽玉樹異風標

光

珠林列星朗躡屐去

後齒復

早囊欣宿澆吊古重追尋

光

披荒增慨慷復

剪燈聯句

貢師泰

元夕同吳子彥劉子清侯敬文會飲水陽陳善

甫家用剪燈聯句云

夜煖拈香繭春寒落剪刀芳心連巧結貢綺思出長縑

點綴輕蟬翼吳裝粘細鳳毛風光凝瑣碎貢雲葉護周

遭影爍金垂燼侯光融玉作膏舞裯團落絮劉歌扇逐

飛桃帶轉銀幡小貢輪迴寶蓋高蜘蛛圍露網吳顧兔

墮秋毫鶯擲翻紅雪侯魚跳起碧濤春陽噓蛺蝶劉秋

冷蛻虫螭翠薄荷分鈿絲柔柳散條青童來絳節玉女

翳纖韜碎訝珠胎迸尖愁燕尾翺微茫縈錯落斜隙漏

蒲萄飴釜空燒蠟棚山謾結鰲浮塵籠漠漠流水眩滔
滔纂綺難為密裁綃祇自勞嬋娟妬清夜蟬竦落晴臯
製異宮人綬榮懷學士絢未曾分寶炬先許照欄袍劇
賞尊頻倒窮搜筆屢操盍簪嘶騷裏奮袖舞豪曹酒促
華筵散詩慚白戰鏖時平無夜禁繁弱且歸弢貢

集句體

集句者集古人之句以成篇也前古未有宋王介甫
始盛行之石曼卿以文為戲近代見之尤多雖未足

以益後學庶幾有以見詩家組織之工也置之卷末
孰云不可

集句餞張知事子中 盧摯

子中吾友秩滿總幕受代屬余訪予山中禮意
良厚至今耿耿不能弭忘聞還衛有日逋客盧
摯偶讀陶詩至一朝辭吏歸從我潁水濱有會
於心遂集比成章遠寄祖席兼叙高義永以為
好也

和澤周三春桃李羅堂前勁風無榮木於我若浮煙與
子相遇來傾蓋定前言歲月好已積玉石乃非堅一朝
辭吏歸悠然見南山從我潁水濱虛室有餘閒故人賞
我趣賴古多此賢吾駕不可迴悵恨獨策還靡靡秋已
夕亭亭月將圓青松冠巖列白雲宿簷端此中有真意
弱毫多所宣登高餞將歸路遐無由緣良才不隱世來
會在何年

集淵明句題中甫員外稼亭黃潛

東方有一士客養千金軀束帶候鳴雞出則陪文輿代
耕本非望暫與園田疎園田日夢想投冠旋舊墟興言
在茲春新疇復應畬田父有好懷過門更相呼披草共
來往履歷周故居悠悠待秋稼時還讀我書雖未量歲
功栖遲固多娛此事真復樂此語真不虛餞送傾皇朝
歸予念前途前途當幾許直至東海隅古時功名士事
事在中都遙遙沮溺心君情定何如

集淵明句題胡主簿嘉樹軒

孟夏草木長霜露憔悴之藹藹堂前林冬夏常如茲嚴
霜九月中卓然見高枝如何捨此去白日掩荆扉深谷
久應蕪此蔭獨不衰黽俛六九年懷此貞秀姿常恐負
此懷未足為高栖及時當勉勵慷慨思南歸親戚共一
處日夕歡相持披榛步荒墟登高賦新詩坐止高蔭下
一觴聊可揮從今至歲寒縱心復何疑

永嘉王君自製挽歌辭蓋能安死生而未忘情死
生者也集淵明句以釋之

自古皆有歿我今始知之居常待其盡逝將不復疑人
生無根蒂去來何依依既來孰不去奄去靡歸期復得
返自然人間良可辭何事空立言念此懷悲悽日醉或
能忘一觴聊可揮且極今朝樂千載非所知

集杜句述懷寄見心

釋至仁

宿鳥戀本枝南鴈意在北飄飄媿此身一歲四行役所
憂盜賊多不獨凍餒迫東下姑蘇臺殘年傍水國金銀
佛寺開信義無與適細人尚姑息賢者貴為德之子曰

玉溫令我心悅懌晤語契深心洞徹有清識學貫天人
際溟漲與筆力神功接混茫風雷纏地脉靈芝冠衆芳
冰壺動瑤碧紫燕自超詣尤異是龍脊流傳必絕倫許
與必詞伯喧爭懶着鞭飛騰知有策吾道屬艱難鸞鳳
有鍛翮天門鬱嵯峨乘槎斷消息干戈尚縱橫道路時
通塞顧惟魯鈍姿養生終自惜桃源無處尋黎民糠粃
窄故園莽丘墟夢歸歸未得悵彼高飛禽何以有羽翼
匡山讀書處宿昔長荆棘陰房鬼火青戰地骸骨白內

思書重寄看雲淚橫臆西江萬里船終當掛帆席天寒
鷓鴣呼北風破南極梅花已飛翻節序昨夜隔感激在
知音書此豁平昔

集杜句題五馬圖 韓性

使君五馬一馬馳聲價倏然來向東飛電流雲絕瀟灑
迥立閭闔生長風肉髮磊砢連錢動大宛立仗青絲鞵
不須對此成歎嗟古來才大難為用

入安南絕不作詩清明感事集句 陳孚

十里宜春下苑花五年寒食住京華
自憐慣識金蓮燭奉使虛隨八月槎

又

回首扶桑銅柱標芙蓉帳煖度春宵
清明寒食誰家哭折戟沉沙鐵未消

又

水流花謝兩無情獨上高樓望帝京
閒憶金明池上路人生看得幾清明

又

江東行客思悠哉，不盡長江滾滾來。
寒食清明都過了，鷓鴣飛上越王臺。

又

台州地濶海冥冥，人踏金鰲背上行。
獨在異鄉為異客，無花無酒過清明。

又

慈母年高鶴髮垂，鄉書無鴈到家遲。
初過寒食一百六

一日思親十二時

又

共藉梨花作寒食
孟光舉案與眉齊
越裳翡翠無消息
夜合花前日又西

又

寒食家家出古城
滿川風雨看潮生
八千里外飄零客
起向朱櫻樹下行

又

一百五日寒食雨風光別我苦吟身尚書氣與秋天杳
同是天涯流落人

又

海上乘槎上紫氛清明時節雨紛紛虎牙銅柱皆傾側
水盡天南不見雲



元詩體要卷八